



20197
4437
251



Inches
Centimetres
TIFFEN Color Control Patches
© The Tiffen Company, 2007

欒城集卷之七

宋眉山蘇轍子由著


詩五十六首

次韻子瞻送范景仁遊嵩洛

尋山非事役行路不應難
洛浦花初滿嵩高雪尙寒
平林抽凍筍奇艷變山丹
節物朝朝好肩輿步步安
醪醖釀臘酒苜蓿薦朝盤
得意忘春晚逢人語夜闌
歸休三黜柳賦詠五噫鸞
鶴老身仍健鴻飛世共看
雲移忽千里世路脫重灘
西望應思蜀東還定過韓



王執禮于敬
顧天叙禮初
全校



平川涉清潁絕頂上封壇出處看公意令人欲棄官

送蔣夔赴代州教授

憶遊太學十年初猶見胡公豈弟餘遍閱諸生非有道最憐能賦
似相如青衫共笑方持板白髮相看各滿梳暫免百憂趨長吏勉
調三寸事新書

次韻宿州教授劉涇見贈

此身雖復類潛夫衰老無心強著書道路不知奔走賤交遊空怪
往還疎弦歌更就三年學簿領唯添一味愚它日相逢定何處莫
將文采笑空疎

徐州送江少卿

夜雨泗河深曉日輕舟發帆開送客遠城轉高臺沒居人永瞻望
歸意何倉卒公來初無事豐歲多牟麥鈴閣渡清風芳罇對佳客
登臨未云厭談笑方自適朝廷念薰老府寺虛清劇何以寄風流
江山遶官宅

次韻子瞻寄眉守黎希聲

眼看狂瀾倒百川孤根漂蕩水無邊思家松菊荒三逕回首謳歌
沸二天簿領沉迷催我老春秋廢格累公賢隣居屈指今誰在一
念傷心十五年

轍昔侍先人於京師與希聲隣居太學前是時公
之亡兄與二亡妣皆在今十五年而在者唯公與

僕二人言之流涕

和李邦直學士沂山祈雨有應

宿雪雖盈尺不救春夏旱吁嗟遍野天不聞歌舞通宵龍一戰旋
開雲霧布旌旗復遣雷霆助舒卷雨聲一夜洗塵埃流入溝河朝
不見但見青青黍與禾老農起舞行人歌汗邪滿車尙可許供輸
到骨期無它水行天地有常數歲歲出入均無頗半年分已厭枯
槁及秋更恐憂滂沱誰能且共蛟龍語時布甘澤無庸多

陪子瞻遊百步洪

城東泗水平如席城頭遠山涵落日輕舟鳴榔日生風渺渺江湖
動顏色中洲過盡石縱橫南去清波頭盡白岸邊怪石如牛馬銜
尾舳艫誰敢下沒人出沒貞尺間卻立沙頭手足乾客舟一葉久
未上吳牛回首良間關風波蕩潏未可觸歸來何事嘗艱難樓中
吹角莫煙起出城騎火催君還

李邦直見邀終日對臥南城亭上二首

一徑坡陀草木間孤亭勝絕俯川原青天圖畫四山合白晝雷霆
百步喧煙柳蕭條漁市遠江洲蒼莽白鷗翻客舟何事來忽草逆
上波濤吐復吞

東來無事得遨遊奉使清閑亦自由撥棄簿書成一飽畱連語笑

失于憂舊書半卷都如夢清簟橫眠似欲秋聞說歸朝今不久塵埃還有此亭不

次韻邦直見答二首

真能一醉逃煩暑定勝三杯禦臘寒自有詩書供永日莫將絲竹亂風灘舞雩何處歸春莫叩角誰人怨夜漫聞道丹砂近有術鎚銖稱火共君看

五斗塵勞尚足畱閉門聊欲治幽憂羞爲毛遂囊中穎未許朱雲地下遊無事會須成好飲思歸時亦賦登樓羨君幕府如僧舍月向城隅看浴鷗

再次前韻四首

城頭棟宇恰三間楚望淒涼弔屈原雨洗山川百里淨風吹語笑一城喧鄉書莫問經時絕歲事初驚片葉翻南近清淮鱸鰕好釣筒時問有潛吞
謬將疎野託交遊平日論心亦有由科第聯翩叨舊契利名疎闊少新憂清談已覺忘朱夏濁酒先防虐素秋多病無聊唯有睡頻頻詩句未嫌不

野鶴應疑鳧鴈苦夏蟲未慣雪霜寒隱居顏氏終安巷垂釣嚴生自有灘破宅不歸塵可埽下田初種水應漫退耕尚作悠悠語拙

宦猶須步步看

欲作彭城數月留溪山勸我暫忘憂城頭準擬中秋望臺上遷延
九日遊嵐氣雨餘侵近郭江聲風送隱危樓汀洲聚散知誰惟且
學漂浮水上鷗

雨中陪子瞻同顏復長官送梁燾學士舟行歸汶上

客從南方來信宿北方去手棹木蘭舟不顧長江雨江昏氣陰黑
雨落無朝暮肅肅赴波濤濛濛暗洲渚微涼入窗闔斜吹濕蕉芋
漂灑正紛紜談笑方容與不知江路長但覺青山驚客去浩難追
落日平西浦東遊本無事愛此山河古周旋樽俎歡邂逅英豪聚
茲遊有遺趣此樂恐宜屢賤仕迫程期遷延防譴怒秋風日已至
輕舸行當具陰森古城曲蒼莽交流處懸知別時念將行重回顧
非緣一寸祿應作三年住

同子瞻泛汴泗得漁酒二詠

江湖性終在平地難久居淶水雨新漲扁舟意自如河身縈疋素
洪口轉千車願言棄城市長竿夜獨漁

其二

懶思久廢詩病腸不堪酒強顏水石間濫蹟賓主後不知白浪翻
但怪青山走莫隨使車塵豈畏巖城斗

明日復賦

放舟城西南卻向東南泊朝來雨新霽白水浸城腳古汴多流莖
清泗亦浮沫平吞百澗暴滅盡三洪惡遊人不勝喜水族知當樂
舟行野鳧亂網盡修鱗躍香醪溜白蟻鱸縷填花萼人生適意
一醉皆應諾同遊非偶然後會未前約簡書尚見寬行日爲公卻
贈吳子野道人

食無酒肉腹亦飽室無妻妾身自好世間深重未肯回達士清虛
輒先了眼看鴻鵠薄雲漢長笑駑駘安棧阜腹中夜氣何郁郁海
底朝陽常杲杲一屨不顧舊山深萬里來看故人老空車獨載王

陽橐遠遊屢安期棗東州相逢真邂逅南國思歸又驚矯道成

方平背癢莫念麻姑爪

李邦直出巡青州余不久將赴南都比歸不及見矣作詩贈
別

東道初來託故人南樓頻上泗河濬江山尚有畱人意樽俎寧當
厭客貧顧我及秋行不久問君觸熱去何因西歸涼冷霜風後濁
酒清詩誰與親

司馬君實端明獨樂園

子嗟邙中親藝麻邵平東陵親種瓜公今歸去事農圃亦種洛陽

千本花修篁遶屋韻寒玉平泉入畦紆臥地錦屏奇種斲巖竇嵩
高靈藥移萌芽城中三月花事起肩輿遍入公侯家淺紅深紫相
媚好重樓多葉爭矜誇一枝盈尺不論價十千斗酒那容賒歸來
曳履苔逕滑醉倒閉門春日斜車輪班班走金轂印綬若若趨朝
衙世人不顧病楊綰弟子獨有窮侯芭終年著書未曾厭一身獨
樂誰復加宦遊嗟我久塵土流轉海角如浮槎歸心每欲自投劾
孺子漸長能扶車過門有意奉談笑幅巾懷刺無袍鞞

送顏復赴闕

簞瓢未改安貧性鳧繹猶傳直道餘不見失官愁感感但聞高臥
起徐徐居中舊厭軍容講補外仍遭城旦書此去將身置何言

風未免憶鱸魚

王詵都尉寶繪堂詞

侯家玉食繡羅裳彈絲吹竹喧洞房哀歌妙舞奉清觴白日一醉
萬事忘百年將種存慨慷西取庸蜀踐戎羌戰袍賜錦盤鵬章寶
刀玉玦餘風霜天孫渡河夜未央功臣子孫白且長朱門甲第臨
康莊生長介胄羞膏粱四方賓客坐華堂何用爲樂非笙簧錦囊
犀軸堆象牀竿又連幅翻雲光手披橫素風飛揚長林巨石插雕
梁清江白浪吹粉牆異花沒骨朝露香

徐熙畫花落筆縱橫其子嗣變格以五色染就不見

筆迹謂之沒骨蜀
趙昌蓋用此法耳
華禽猛獸舌齧張騰踏驤裏聯驕驕噴振風雨

馳平岡前數顧陸後吳王老成雖喪存典常坐客不識視茫洋騏
麟飛烟郁芬芳卷舒終日未用忙遊意淡泊心清涼屬目俊麗神
激昂君不見伯孫孟孫俱猖狂干時與事神弗臧

逍遙堂會宿二首

并引

嫩從子瞻讀書未嘗一日相舍既壯將遊宦四方讀韋蘇州詩
安知風雨夜復此對床眠惻然感之乃相約早退為閑居之故
子瞻始為鳳翔幕府畱詩為別日夜雨何時聽蕭瑟其後子瞻
守餘枕復移守膠西而轍滯畱於淮陽濟南不見者七年熙寧

年二月始復會於澶濮之間相從來徐畱百餘日時宿於逍遙

堂追感前約為二小詩記之

逍遙堂後千尋木長送中宵風雨聲誤喜對床尋舊約不知漂泊
在彭城

秋來東閣涼如水客去山公醉似泥困臥北窗呼不起風吹松竹
雨淒淒

過張天驥山人郊居

南山莫將歸下訪張夫子黍稷滿秋風蓬麻翳隣里君年三十八
三十有歸意躬耕奉慈親未覺鋤耰鄙讀書北窗竹釀酒南園水

松菊半成陰日有幽居喜客來時借問問子何年起新求西溪石
更築茆堂址但令三歲熟此計行亦遂堂成不出門清名滿朝市

魏佛狸歌

魏佛狸飲泗水黃金甲身鐵馬箠睨山川俯畫地畫作西方佛
名字卷舒三軍如使指奔馳萬夫鑿山背雲中孤月妙無比青蓮
湛然俛下視擊鉦卷旆抽行營北徐府中軍吏喜度僧築室依雲
烟俯窺城郭眾山底興亡一瞬五百年細草荒榛沒孤壘

雜興二首

陋巷丈夫病且貧懸鶉百結聊庇身蠕蠕大蟲長孫子敗繒敝絮
開陽春故濡寬博裏肩胛出沒逡巡初莫畏一朝換酒入隣家顧
視腰間猶犢鼻入縫循腰還自足肌膚轉近尤爲福咋皮吮血無
已時應待渠家具湯沐

朱輪華蓋事遠遊廡無良馬乘疲牛青絲玉勒金絡頭任重道遠
旁人憂奔馳往來歷山邱騰坑投淖摧轅輶已壓復起行未休青
芻黃梁爲君羞長路漫漫經九州場有白駒胡不收飢食玉山飲
河流朝秣幽冀莫炎陬奔雲掣電不少留僕夫顧之心懷愁王良
不生誰與謀哀哉駿骨千金酬

贈致仕王景純寺丞

瀟山隱君七十四紺瞳綠髮初謝事腹中靈液變丹砂江上幽居
連福地彭城爲我住三日明月滿船同一醉丹書細字口傳訣顧
我沉迷真棄耳年來四十髮蒼蒼始欲求方救憔悴它年若訪瀟
山居慎勿逃人改名字

初發彭城有感寄子瞻

秋晴卷流潦古汴日向乾扁舟久不解畏此行路難此行亦不遠
世故方如山我持一寸刃巉絕何由刊念昔各年少松筠閩南軒
閉門書史叢開口治亂根文章風雲起胸膽渤海寬不知身安危
俛仰道所存橫流一傾潰萬類爭崩奔孔融漢儒者本自輕曹瞞

誓將貧賤身一悟世俗昏豈意十年內日夜增濤瀾生民竟顛顛
遊宦豈復安水深火益熱人知蹈憂患甄豐且自叛劉歆苟盤桓
而况我與兄飽食顧依然上顧天地仁止此禍亂源歲月一徂逝
尙能反邛園

次韻子瞻見寄

袞袞河渭濁皎皎江漢清源流既自異美惡終未明嗟我頑鈍質
乃與公竝生出處每自託謳吟輒嘗磨磨如病足馬共此千里程
勝負坐已決豈待終一枰憶公年少時濯濯吐新萌堅姿映松栢
直節凌榛荆學成志益厲秋霜落春榮澹然養浩氣脫屣遺齊卿

百鍊竟不變三年終未鳴區區兩郡守籍籍四海聲年來效瘖默
世事慵譏評不見室家好愧如揖重城別離長塵垢歲月何崢嶸
彭門偶會合白髮互相驚受教恐不足吐論那復爭疾雷發聾聵
清月照昏盲篤愛未忍棄浪云舊齊名更請問郭許題品要當精
子瞻杭州見寄詩云
先生別駕舊齊名
將至南京雨中寄王鞏
河牽一線流不斷雨散千絲卷却來烟際橫橋村十里船中倦客
酒三杯老年轉覺脾嫌濕世路早令心似灰賴有故人憐寂寞
舟待我久徘徊

次韻王鞏見贈

南都逢故人共此一樽滌初來柳吹絮再見風脫木我老歡意微
頭重腰背曲羨子方少年健馬走平陸狂歌手自拊醉倒頭相觸
人生比一瞬世網張萬目但取食場雞豈掛雲飛鶴彭城久相遲
官舍虛東屋重陽試新釀謂子當不速胡爲聽婦言婉孌自相逐
我舟得愁霖牽挽脫坑谷風霜作初寒病體欲生粟解子腰下龜
換酒不須贖照碧凝清光相將飲萸菊

送交代劉莘老

建元一二間多士四方至翩翩下鴻鵠一一抱經緯功名更唯諾

爵祿相饋遺縱橫聖賢業磊落君臣意慷慨魯諸生雍容古君子
扶搖雲漢上睥睨千萬里入臺霜凜然不肯下詞氣失足青冥中
投命江湖裏區區畱都客矯矯當世士空使往來人歎息更相指
我生本羈孤無食強爲吏寒裳避塗泥十載守顛頓逝將老茅屋
何幸繼前軌念君今尙然顧我真當爾百年同一夢窮達浪憂喜
有酒慰離愁貧賤非君恥

次韻王鞏九日同送劉莘老

頭上黃花記別時樽中淡酒慰清悲畫船牽挽故不發紅粉畱連
未遽離小雨無端添別淚遙山有意助顰眉十分酒盞從教勸堆

案文書自此辭

次韻王鞏欲往徐州見子瞻以事不成行

河水南來遶郡城銀刀空復銜衙兵交情舊許雞爲具客信那知
鵲妄鳴爲婦遲畱應未怪還家舍卒定何營不關秦女箏聲怨自
趨招賢浚上旌

宣徽使張安道生日

從公淮陽今幾年憶持壽尊當公前祝公齒髮老復少歲歲不改
冰霜顏掃除四海一清淨整頓萬物俱安全今年見公商邱側奉
祠太一眞仙官身安氣定色如玉脫遺世俗心浩然幽居屢過赤

松子長夜親種丹砂田此中自有不變地歲閱生日如等閑門前
賀客任填委世上多故須陶甄秋風坐見蒲柳盡歲晏惟有松栢
堅斯人未安公未用使公難老應由天

章氏郡君挽詞

子厚母

馮唐垂老郎潛後李白風流罷直餘解組同歸榮故國剖符仍得
奉安輿家聲未替三公舊葬客應領數郡車德映閨門人莫見埋
文子細列幽墟

聞王鞏還京會客劇飲戲贈

聞君歸去便招呼笑語不知清夜徂結束佳人試銀甲畱連狂客
惱金吾燭花零落玉山倒詩筆欹斜翠袖扶暫醉何年依錦瑟東
齋還復臥氍毹

次韻王鞏遊北禪

蕭蕭黃葉下城頭頓作野田風日秋粗有樽壘隨處好甞無敲朴
便能幽人稀野鳥應同樂水涸遊魚似欲愁客去知君歡未已遶
城攜手更遲畱

次韻王鞏懷劉莘老

兩都來往太頻頻真是人間自在人十載讀書同白屋千金爲客
買朱唇結交京邑傾心肺寓思禪宗離垢塵爲問西歸天祿客何

時同看洛川神

飲餞王鞏

送君不辨沽斗酒撥醅浮蟻知君有問君取酒持勸君未知客主
定何人府中杯棬強我富案上苜蓿知吾真空厨赤腳不敢出大
堤花艷聊相親愛君年少心樂易到處逢人便成醉醉書大軸作
歌詩頃刻揮毫千萬字老夫識君年最深年來多病苦侵凌賦詩
飲酒皆非敵危坐看君浮太白

送王鞏兼簡都尉王詵

可憐杜老貧無食杖藜曉入春泥濕諸家厭客頻惱人往往閉門
不得入我今貧與此老同交遊冷落誰相容幸君在此足遊衍終
日騎馬西復東送君仍令君置酒如此貧交世安有君歸速語王
武子因君回船置十斗

呂希道少卿松局圖

溪回山石間蒼松立四五水深不可涉上有橫橋渡溪外無居人
磐石平可住縱橫遠山出隱見雲日莫下有四老人對局不回顧
石泉雜風松入耳如暴雨不聞人世喧自得山中趣何人昔相遇
圖畫入紈素塵埃依古壁永日奉樽俎隱居畏人知好事竟相誤
我來再三歎空有飛鴻慕逝將從之遊不惜爛樵斧

寄孔武仲

濟南舊遊中好學惟君耳君居面南麓洶湧岡巒起我來輒解帶
簷下爰背睡煎茶食梨栗看君誦書史君歸苦倉卒窗戶日摧毀
遷居就清曠改築富前址開畦得遺植遶壁見題字雲山顧依然
簿領輒隨至思君猶未忘滿秩行自棄爾來鉅野溢流潦壓城壘
池塘漫不知亭榭日傾弛官吏困堤障麻鞋汗泥滓別來能幾何
陵谷旣遷徙它日重相逢衰顏應不記

孔君亮郎中新葺闕里西園棄官而歸

宦情牢落苦思歸君側無人畱子思手種松筠須灌湖親修寢廟
憶丞祠定應此去添桃李還似舊塋無棘茨他日東遊訪遺烈因
公導我謁先師

寄濟南守李公擇

岱陰皆平田濟南附山麓山窮水泉見發越遍溪谷分流遶塗巷
暖氣烝草木下田滿粳稻秋成比禾菽池塘浸餘潤菱芡亦云足
辭家四千里恃此慰窮獨公從吳興來茗雪猶在目應恐齊魯間
長被塵土辱不知西垣下滉漾千畝淥仰見鷗鷺翻俯視龜魚浴
初來厭桴鼓稍久捐鞭朴清詩調嘉賓夜話繼華燭飛花暮雪深
浮蟻糟床熟相對各忘歸西來自嫌速人生每多故樂事難再卜

鉅野一汗漫河濟相騰蹙流沙翳桑土蛟蜃處人屋農畝分沉埋
城門遭板築傷心念漂蕩引手救顛覆勞苦空自知吁嗟欲誰告
遙知舊遊處落落空遺躅平生讀書史物理粗能矚歸耕久不遂
終作羝羊觸賦詩心自驚請公再三讀

雪中會飲李侔釣東軒三絕

眾客喧譁發酒狂逡巡密雪自飛揚莫嫌作賦無枚叟且喜延賓
有孝王

雪花如掌墮堦除劇飲時看臥酒壺半夜瓊瑤深沒膝欲歸迷路
肯畱無

竹裏茅菴雪覆簷爐香藹藹著蒲簾欲求初祖安心法笑我醺然
已半酣

張恕寺丞益齋

人生不讀書空洞一無有羨若常齋居散帙滿前後開編試尋繹
閱歲行自富從橫畫圖出次第宮商奏汪洋畜江河眇莽包林藪
興亡數千歲絡繹皆在口顧念今所知頗覺前日陋我家亦多書
早歲嘗竊叩晨耕掛牛角夜燭借鄰爨經年謝賓客飢坐失昏晝
堆曾稍蟠屈落筆逢左右樂如聽鈞天醉劇飲醇酎自從厭蓬華
誤逐功名誘初心一漂蕩舊學皆榛莠失足難遽回撫卷長自詬

幸君無事年謂可終身守春耕不厭深秋穫當自受金玉或爲災
詩書豈相負

除夜會飲南湖懷王鞏

歲晚城東故相家夜聽簾外落瓊花醉眠東閣銀缸暗起視中庭
風竹斜魯酒近來無奈薄秦箏別後苦聞誇思君勸對空陂飲歸
去紛如日莫鷗

次韻張恕戲王鞏

去歲此日大雪
僕醉定國東齋

二君豪俊竝侯家歌舞爭妍不受誇聞道肌膚如素練更堪鬢髮
似飛鷗

送轉運判官李公恕還朝

我行未厭山東遠昔遊歷下今梁苑官如雞肋浪奔馳政似牛毛
常黽勉幸公四年持使節按行千里長相見鷹隼秋田伏兔驚驥
馳平野疲牛勸似憐多病與時違未怪兩州從事懶除書奪去一
何速歸袖翩然不容挽黃河東注竭崑崙鉅野橫流入州縣民事
蕭條委濁流扁舟出入隨奔電回首應懷微禹憂歸朝且喜寧親
便公知齊楚卽爲魚勸築宜防不宜緩

坡集卷之八

宋西蜀蘇轍子由著

明東吳王執禮子敬
顧天敘禮初全校

詩六十八首

寄范文景仁

京城冠蓋如雲屯日中奔走爭市門敝裘瘦馬不知路獨向城西
尋隱君隱君白髮養浩氣高論驚世門無賓欣然爲我解東閣明
窗淨几舒華茵春天雪花大如手九衢斷絕愁四隣平明熟睡呼
不覺清詩淥酒時相親我兄東來自東武走馬出見黃河濱及門

卻遣不得入回顧欲去行無人東園桃李正欲發開門借與停車
輪青天露坐列觴豆落花飛絮飄衣巾畱連四月聽鷓鴣扁舟一
去浮奔渾人生聚散未可料世路險惡終勞神交遊畏避恐坐累
言詞欲吐聊復吞安得如公百無忌百間廣厦安貧身

次韻王鞏上元見寄三首

棄擲良宵君謂何清天流月鑑初磨莫辭病眼羞紅燭且試春衫
翦薄羅蓮艷參差明繡戶舞腰輕瘦颭驚鼉少年微服天街闊何
處相逢解佩珂

繁燈厭倦作閑遊行到僧居院院畱月影隨人深有意車音爭陌
去如流酒消鑿落寧論斗魚照琉璃定幾頭過眼繁華真一夢終
宵寂寞禾應愁

燈火熏天處處同暗遊應避栢臺驄高情自放喧闌外勝事偏多
淡泊中平日交遊徒夢想畱都歌吹憶年豐知君未有南來意歸
去相從光與鴻

小安道惠馬

從事年來鬢似蓬破車倦僕眾人中作詩僅比窮張籍得馬還從
老晉公夜起趨朝非所事曉騎行樂定誰同慣乘欵段遊田里怯
聽駸駸兩耳風

張水部集有謝
裴晉公惠馬詩

次韻子瞻贈梁交左藏

彭城欲往臺無檄初喜東西合爲一將軍走馬隨春風精銳千人
森尺籍口占佳句驚眾坐手練強兵試鳴鏑酒酣起舞花滿地醉
倒不聽人扶出歸來相對如夢寐虎踞熊經苦岑寂黃樓方就可
同遊飲盡官厨三百石

寒食遊南湖三首

春睡乍方覺隔牆聞樂聲肩輿試扶病畫舫聽徐行適性逢樽酒
裏挹友生遊人定相笑白髮近從橫

其二

遶郭春水滿被堤新柳黃官池無禁約野艇得飛揚浪泛歌聲遠
花浮酒氣香晚風歸棹急細雨濕紅粧

其三

攜手臨池路時逢賣酒墟柳斜低繫纜草綠薦傾壺波蕩春心起
風吹酒力無冠裳強包裹半醉遣誰扶

觀大閱

承平郡國減兵屯唯有畱都一萬人票姚將軍思出塞從橫幕府
諱和親旌旗不動風將轉部曲無聲馬亦馴八陣且畱遺法在未
須親試革車塵

續坡集卷之八
三
送林子中安厚卿二學士奉使高麗二首

東夷從古慕中華萬里梯航今一家
夜靜雙星先渡海風高八月
自還槎魚龍定亦知忠信象譯何勞
較齒牙屈指歸來應自笑
手持玉帛賜天涯

官是蓬萊海上仙此行聊復看桑田
鯤移鵬徙秋帆健潮闊天低
曉日鮮平地誰言無嶮阻
仁人何處不安全
但將美酒盈船去多
作新詩異域傳

送趙屺秘書還錢塘

世人何局促奔走鬢蒼蒼
聞道餘杭守獨遊何有鄉
禪心朝吐月
元氣夜生光
清靜安罷瘵寬仁服
暴強聲名高一世
風采見諸郎
謁帝朱爲綬還家綵作裳
經過畱畫舫談笑接清觴
問訊顏依舊
崢嶸歲自長
人生真幾許世味不堪嘗
歸去聞詩罷求余卻老方

馬上見賣芍藥戲贈張厚之二絕

春風欲盡無尋處盡向南園芍藥中
過盡此花真盡也此生

此花同

春來便有南園約過盡春風約尙餘
綠葉成陰花結子便須攜客
到君家

答見和

花柳蕭條行已老聖賢希闊未嘗中
眼看芍藥紛紛盡賴有櫻桃
顆顆同

塵編何用朝朝看新釀還須處處餘
好事若能頻載酒不妨時復
到楊家

送呂希道少卿知滁州

長怪名卿亦坐曹忽乘五馬列旌旄
才多莫厭官無事郡小不妨
名自高庶子定應牽賦詠醉翁聊復繼遊遨
試尋苦戰清流下要
識經綸帝業勞

次韻張恕春暮

祇言城市無佳處亦有南湖幾度遊
好雨晴時三月盡啼鸞到後
百花休老猿好飲常連臂野馬依人自絡頭
不肯低回池上醉試
看生滅水中漚

次韻傅宏推官義方亭

居近古城心自幽簞瓢足用更何求
鸞飛旋趁春風出龍臥終聞
暮雨搜科第聯翩收甲乙鄉間驚怪問
因由隱君淡泊無人識長
夏一衫冬一裘

送梁交之徐州

湖水清且深新荷半猶卷未見紅粧窈窕娘
先排翠羽參差扇水

面風生人未知欹傾俯仰長先見岸上遊人莫不歸清香入袖涼
吹面投壺擊鞠綠楊陰共盡清樽滄白飯坐中飛將忽先起輕衫
出試彭門遠百步洪西白浪翻戲馬臺南雲岫滿江山雄麗信宜
人風流孰似梁王苑

次韻王鞏見寄

日永官閑自在慵門前客到未曾通憐君避世都門裏勸我忘憂
酒盞中城下柳陰新過雨湖邊荷葉白翻風早須命駕追清賞大
字新詩事事工

次韻李達見贈

太學羣遊經最明青衫顛顛竟何成藜鹽仍作當年味名譽飛蠅
過耳聲

次韻秦觀秀才攜李公擇書相訪

濟南三歲吾何求史君後到消人憂君言有客輕公侯扁舟相從
古揚州致之四馬恨無力千里相望同異域誦詩空使四坐驚隱
居未易凡人測史君南歸無限情鴻飛攜書墮我庭此書兼置昔
年客袖中秀句淮山青老夫強顏依府縣堆案文書本非願清談
麴醴解人頤安得坐右長相見狂客吾非賀季真醉哈君似謫仙
人末契長遭少年笑白髮應慙傾蓋新都城酒貴誰當換塵埃汗

面非良筭歸來泗上苦思君莫待黃花秋爛漫

秦君與家兄子瞻約秋後再遊彭城

送龔鼎臣諫議移守青州二首

稷下諸公今幾人三爲祭酒髮如銀
梁王宮殿歸畱鑰尙父山河屬老臣
沂水弦歌重曾點菑川故舊識平津
過家定有金錢費千里爭看衣錦身

面山負海古諸侯信美東方第一州
勝勢未容秦地嶮奇花僅比雒城優
新絲出盎冬裘具貢棗登場歲事休
鈴閣虛閑官釀熟應容將佐得遨遊

送余京同年兄通判嵐州

矯矯吳越士遠爲并代行寒暄雖云異慷慨慰平生
我昔在濟南君時事淄青連年食羊炙便欲忘尊羹
問君棄鄉國何似樊屣輕丈夫事所志歸去無田耕
閑官少愧恥教子終餘齡定心養浩氣閉目收元精
此志我亦然偶與長者并會合不可期未易夸者評

次韻王鞏見寄

觸事如某一低昏然一睡更何知賈生流落南遷後
陶令衰遲歸去時去住由人真水母簞瓢粗足亦山雌
年來未省談堯舜一呖龕踈豈足吹

河上莫歸過南湖二絕

西來白水滿南池走馬池邊日落時橋底荷花無限思清香乞與
路人知

淤田水淺客來遲解舫都門問幾時誰道兩京雞犬接差除屈指
未曾知

送提刑孫頤少卿移湖北轉運

持節憂邦刑職業已自簡下車攝畱都談笑事亦辦開軒揖佳客
退食事書卷爲政曾幾何清風自無限官居歲月迫歸念湖湘遠
依依東軒竹凜凜故人面詔書遂公私使節許新換舊治行常經
家山企可見宦遊得鄉國勞苦顧猶願歸旆正滂洋行軻豈容緩

次韻劉涇見寄

天之蒼蒼亦何有亦有雲漢爲之章人生混沌一氣耳嘿嘿何用
知肺腸孔公孟子巧言語剖瓢插竹吹笙簧含宮吐角千萬變坐
令隱伏皆形相我生稟賦本微薄氤氳方寸不自藏譬如蘭根在
黃土春風驅迫生繁香口占手寫豈得已此亦未免物所將方將
寂寞自收斂不受世俗斗尺量旣知仍作未能止紛紜竟亦類彼
莊煎烹心脾擢胃腎自令鬢髮驚秋霜嗟子獨未知此病從橫自
恃觜爪剛少年一見非俗物鏘然修竹鳴孤凰近來直欲扛九鼎
令我畏見筆力強提攜童子從冠者揣摩五帝論三皇詩書近日

貴新說掃除舊學漫無光竊攘瞿曇剽李耳牽挽性命推陰陽
流滾滾去不返長夜漫漫未遽央詞鋒俊發魯連子慚愧田巴稱
老蒼是非得失子自了一醉早醒余所望

城南訪張恕

事似棼絲撥不開秋隨脫葉暗相催城南綠野宜幽步水北紅塵
漫作堆赤棗青瓜報豐熟黃雞白酒勸徘徊此中真有醇風在一
畝何年斲草萊

同李倅鈞訪趙嗣恭留飲南園晚衙先歸

城南高樓出喬木下有方塘秋水足新霜未變草木鮮晚日旋催
梨棗熟雨荒松菊半榛莽風老菰蒲初瑟縮門前大路多塵土日
中過客無畱轂開門卻埽如有待下馬升堂真不速勸我一振衣
上黃臨風共倒樽中淥肴蔬草草意不盡絲竹泠泠暗相屬琳宮
仙伯自閒暇幕府龕官苦煩促晚衙簿領當及期後堂車轄要須
漉令人更愧東宮師眷戀溪山棄華屋

次韻轉運使鮮于侁新堂月夜

長愛陶先生閑居棄官後床上臥看書門前自栽柳低徊顧微祿
畢竟誰挽袖索莫秋後蜂青熒曉天宿惟將不繫舟託此春江溜
尺書慰窮獨秀句驚枯朽遙知新堂夜明月入杯酒千里共清光

續坡集卷之八
九
照我茅簷漏

送梁交供知莫州

猛士當令守四方中原諸將近相望一樽度日空閒暇千騎臨邊
自激昂談笑定先降虜使詩書仍得靖戎行君看宿將何承矩安
用摧鋒百戰場

秋祀高禘二絕

蕩蕩巍巍堯舜前一邱惟見栢森然後來秦漢何堪數跋扈飛揚
得幾年

乾德年中初一新顏垣破瓦委荆榛興亡舉墜干戈際閒暇方知

國有人

過興教贈釗上人

四十年間此院畱臨河看盡往還舟向來竝是三年客聽說行藏
各自羞

次韻王鞏代書

去年河上送君時我醉看君倒接籬一笑便成經歲隔扁舟重到
滿城知舊傳北海偏憐客新怪東方苦憇饑應笑長安居不易空
吟原上草離離

次韻南湖清飲二首

翠箔紅窗映大堤遠來清飲歎參差盈盈積水東西隔脈脈幽懷
彼此知淥酒謾傳工破悶主人何敢怪顰眉明朝看月雲開未試
與詹家一問龜

坐客經年半已非喜君重到暫相依不嫌愛酒樽頻倒只怕題詩
紙屢飛耿耿幽懷誰與愬徐徐細酌未應違從今更肯相過否幾
誤風吹白版扉

次韻偶成

交情淡泊久彌新吏役縈纏日益紛香火社中真避世簿書叢裏
強論文樽罍正及明蟾夜舟楫來隨早鴈羣世俗如君今有幾真

將富貴等浮雲

中秋見月寄子瞻

西風吹暑天益高明月耿耿分秋毫彭城閉門青嶂合臥聽百步
鳴飛濤使君攜客登燕子月色着大冷如水筵前不設鼓與鐘處
處笛聲相應起浮雲卷盡流金丸戲馬臺西山鬱蟠杯中淥酒一
時盡衣上白露三更寒扁舟明日浮古汴回首逡巡陵谷變河石
巨野入長淮城沒黃流只三版明年築城城似山伐木爲堤堤更
堅黃樓未成河已退空有遺蹟令人看城頭見月應更好河流深
處今生草子孫幸免魚鼈食歌舞聊寬使君老南都從事老更貧

羞見青天月照人飛鶴投籠不能出曾是彭城坐中客

次韻王鞏自詠

平生未省爲人忙貧賤安閑氣味長粗免趨時頭似葆稍能忍事
腹如囊簡書見迫身今老樽酒聞呼首一昂欲挽天河聊自洗塵
埃滿面鬢眉黃

次韻王鞏同飲王廷老度支家戲詠

白魚紫蟹早霜前有酒何須問聖賢上客遠來工緩頰雙鬢爲出
小垂肩新傳大曲皆精絕忽發狂言亦可憐莫怪貧家少還往自
須先辦買花錢

送王鞏之徐州

遨遊公卿間結交非不足高秋遠行邁黃泥沒馬腹問君胡爲爾
笑指籬間菊故人彭城守久作中朝逐詩書自娛戲樽俎當誰屬
相望鶴頸引欲往龜頭縮前期失不遂浪語頻遭督黃樓適已就
白酒行亦熟登高暢遠情戲馬有前蹤篇章雜笑語行草爛盈幅
歸來貯篋笥把玩比金玉吾兄別我久憂患欲誰告孤高多風霆
彈射畏顛覆白頭日益新歲寒喜君獨紛紛眾草中冉冉凌霜竹
恨我閉籠樊無由託君轂

次韻張恕九日寄子瞻

無限黃花簇短籬
濁醪霜蟹正堪持
坐曹漫爾誇勤瘁
割肉何妨

誚詆欺世外
罇罍終自放
俗間簿領莫相縻
茱萸插遍知人少
談

笑須公一解頤
王摩詰詩云遙知兄弟登
高處插遍茱萸少一人

戲次前韻寄王鞏二首

白馬貂裘錦翼羅
離觴激灑手親持
頭風欲待歌詞愈
肺病甘從

酒力欺不分歸心
太忽草更憐人事
苦縈縻相逢借問
空長歎便

捨靈龜看朶頤

細竹寒花出短籬
故山耕耒手曾持
宦遊暫比鳧鷖集
歸計長遭

句僂欺歌舞夢回
空歷記友朋飛去
自難縻悠悠後會
須經歲冉

冉霜髭漸滿頤

贈杭僧道潛

月中依松鶴露下
抱葉蟬賦形已孤
潔發響仍清
圓潛師本江海

浪迹遊市塵髭長
不能剪納壞聊復
穿瘦骨見圖畫
禪心離攀緣

出言可人意一一
皆自然問師藏何
深不與世俗傳
舊識髯學士

復從璉耆年塵埃
既脫落文彩自精
鮮落落社中人
如我亦有旃

柰何一相見撫卷
坐長歎歸去勿復
言山林信多賢

張安道生日二首

椿年七十二迴
新蓬矢桑弧記此
晨養就丹砂無上
藥已超諸數

自由身中年道路趨真境外物功名委世人今夜空庭香火罷定
應星斗識天真

十載從公鬢似蓬羨公英氣老猶克生時別得星辰力晚歲仍加
鼎竈功世事不堪開眼看勞生漸恐轉頭空問公試覓刀圭藥歲
歲稱觴此日中

李鈞壽花堂 并敘

堂在鄆晉陵李公秉性直而和少從道士得養生法未五十去
老而不衰爲南都通守其西堂北牖下池生菖蒲開花三四
可愛以書占之曰此壽考之祥也因名其堂曰壽花而余爲

記之

石上菖蒲十二節仙人服之好顏色根如蟠龍不可得葉中開花
誰復識夫子自少讀道書年未五十嗜欲除河流通天非轆轤下
入金鼎融爲珠一醉斗酒心自如鬼物窺覘驚睚眦菖蒲花開壽
之符白髮變黑顏如朱它年三朞訪君廬拍手笑我言不虛

次韻子瞻題張公詩卷後

世俗甘枉尺所願求直尋不知一律訛大樂無完音見利心自搖
慮害安得深至人不妄言淡如朱絲琴悲傷感舊俗不類騷人淫
又非避世翁閔嘿遽陽瘖嚶晨雞鳴豈問晴與陰世人積寸木

坐使高樓岑晚歲臥草廬誰聽梁甫吟它年楚倚相儻能記憶情
次韻廣州陳繹諫議和陳薦宋敏求二龍圖二首

會送飛龍白日翔未應中路許還鄉鶴歸仍有當年伴松老知經
幾度霜城下寶坊聊寄榻朝中振鷲舊成行相逢出處何須問五
嶺清平十月涼

右和彥升寓定力

琳宮清淨思悠哉頗似山林未肯迴五日趨朝眞自適一樽無事
得頻開董狐執筆何時易馬援征蠻未遽來奔走安閑誰定是都
門攜手一徘徊

右和彥升赴上醴泉

次韻王廷老寄子瞻

歌吹新成百尺臺青山臨水巧崔嵬佳人解作回文語狂客能鳴
摻鼓雷擷菊傳杯醒復醉採菱盪漿去仍回新年聞欲相從飲春
酒遠須剩作醅

次韻頓起考試徐沂舉人見寄二首

齊楚諸生儼輶紳人人願得出君門銜枚勇銳驚初合棄甲須臾
訝許奔細讀未辭燈損目久畱終厭棘爲藩定應親刈翹中楚把
卷喧呼半夜言

老年從事泰南京海內交遊尙記名怯見廣場心力破厭看細字
眼花生新科未暇通三尺舊曲惟知有六莖空憶倚樓秋雨霽與

君看遍洛陽城前舉與頓同
試西京舉人

送李鈞郎中

君家毗陵本江南雖為浙西終未甘風流秀發自不減氣質渾樸
猶中含敲榜滿前但長嘯簿書堆案常清談湖中往往載畫舫竹
下小小開茅庵歌吟髣髴類騷雅導引委曲師彭聃新茶潑乳睡
方覺淥酒傾水醒復酣一朝揮手去不顧使我把袂心難堪扁舟
水涸費牽挽瘦馬雪凍憂朝參一官來往似秋鷺薄俸包裹如春

蠶東南乞糜尙可得白首誰念家無饑

送文與可知湖州

連持梁洋印久作溪山主深知為郡樂但畏買茶苦來歸天祿閣
坐守登聞鼓九重未明入百辟盈庭舞城南獨歸臥心事誰當語
舊聞吳興勝試問天公取家貧囊裝盡歲莫輕帆舉茗溪淨多石
弁嶺瘦無土湖藕雪冰絲山茶潑牛乳香粳飯玉粒鮮鯽鱸紅纓
宮開水精潔人寄畫屏住俗吏自難堪詩翁正當與從來思清絕
況乃病新愈團團肘後丹嵩嵩胸中素高臥鎮夸俗清談靜煩訴
應笑杜紫微湖亭但狂顧

次韻王鞏見寄

池上輕冰暖卻開，迎春送臘仰銜杯。
君家有酒能無事，客醉連宵遣不迴。
詩就滴消盤上蠟，信來飄盡嶺頭梅。
商邱冷坐君知否，餅罄應須有恥囂。

喜雪呈鮮于子駿三首

發函寬大一封書，臥閣雍容三日餘。
旋見雪花投夜落，未應天意與人疎。
瓦乾淅淅初鳴霰，畦潤漸漸想沒鉏。
高會梁園遺勝在，早知詞賦似相如。

春秋無麥自當書，況復秋田水潦餘。
一雪端來救焦槁，千箱乞與等親疎。
消殘溫癘曾非藥，蝕遍陳根不用鉏。
猶恐遠村霑未足，試呼農圃問何如。

蠶紙鋪庭幾誤書，楊花糝逕未春餘。
積隨平野分高下，舞信微風作密疎。
解使遊人似姑射，仍令飛鳥變春鉏。
共驚天巧無能學，造物無心本亦如。

次韻文務光秀才遊南湖


料峭東風助臘寒，汀澄白酒借衰顏。
滿床書卷何曾讀，數步湖光自不閑。
夢想綠楊垂後浦，眼看紅杏照前山。
新春漸好君歸速，不見遊人暮不還。

湖前小山
日杏山

子瞻惠雙刀

彭城一雙刀黃金錯刀鏤春如雙引繩色如青琅玕開匣飛電落
入手清霜寒引之置膝上凜然愁肺肝我衰氣力微覽鏡毛髮斑
誓將斬鯨鯢靜此滄海瀾又欲戮犀兕永息行路難有志竟不從
撫刀但長歎投刀淚如霰北斗空闕干歸來刈蓬蒿鋤田植芳蘭
惜刀不忍用用亦非所便棄置塵土中坐使鋒刃剗床頭夜生光
知有蛟龍蟠慚君贈我意時取一磨看

畱守與賓客會開元龍興寺觀燈余有故不預中夜登南城
燈引雙旌萬點紅傾城車馬在城東使君行樂人人共勸客安眠
夜夜同夢想笑談傾滿坐臥聞歌筵逐春風三更試上南樓看無
限繁星十里中



樂城集卷之九

宋西蜀蘇轍子由著

明東吳王執禮子敬全攸
顧天敘禮初

詩七十首

春日耕者

陽氣先從土脈知老農夜起飼牛飢
雨深一尺春耕利日出三竿
曉餉遲婦子同來相嫵媚
烏鳶飛下巧追隨
紛紜政令曾何補
要

取終年風雨時

自柘城還府馬上

春色無人見茲行偶眾先柳黃新過雨麥綠稍鋪田河潤兼冰散
禽聲向日圓城池高受霧濼渙暖生烟送客情初惡還家意稍便
旋聞夫事起已過佛燈然簿領何時畢塵埃空自憐南湖漸可到
早治木蘭船

次韻子瞻人日獵城西

將賢士氣振令肅軍聲悄晨登戲馬臺一試胡騾裒城空巷無人
里社轉相曉吾公庶無疾但恐園園小荆榛一焚蕩雉兔皆驚矯
翩翩白馬將手把青絲挑少小事邊微斬刈輕茶蓼殿前賜鞍勒
珂月明皎皎自言得所事強暴無不了廟筭本詩書下策禁焚燎
當令百鍊剛甘就一指繞低回未嘗試坐被世人少秋霜一朝下
凌厲見鷺鳥爲君整驕惰重立穰苴表

送鮮于子駿還朝兼簡范景仁

蜀中耆舊今無幾相逢握手堪流涕勸遊潦倒不還家舊俗陵遲
真委地錢荒粟帛賤如土權峻茶鹽不成市詩書鄉校變古法節
行故人安近利欲歸長恐歸不得歸去相歡定誰是低徊有似羊
觸藩眷戀僅同雞擇米中山先生昔所愛南都攝尹私相喜窮冬
夜長一事無燈火相從夜深睡讀書萬卷老不廢感寓百篇深有
意俗吏惟知畏簡書窮途豈意逢君子春風歸騎忽西顧平日高

談應且止朝騎疋馬事朝謁莫就一床華夢寐猶有城西范蜀公
買地城東種桃李花絮飛揚酒滿壺談笑從容詩百紙紅塵暗天
獨不知白首相看兩無愧古人避世金馬門何必柴車返田里

次韻秦觀見寄

東家有賢人西家苦相忽幽蘭委冰霜掩靄特未發春風限芳蕤
爛漫安可沒東南信多士人物世不闕考槃溪山間自獻恥干謁
誰憐幽閒女艷色比南越垂耳困鹽車捐金空買骨讀書謝世事
閉門動論月子生亦羈旅處世常卒卒誰令釣竿手強復此持筭
惟餘七尺軀空洞中無物時蒙好事過解榻聊一拂野情樂江海
夢想扁舟兀隱居便醉睡世路多顛蹶榮華一朝事毀譽百年歇
相勸沐咸池陽阿晞汝髮

次韻道潛見寄

蕭蕭華髮映衰容慙愧高僧歎不逢遊宦終身空處處塵埃何日
退重重已甘憔悴雞羣鶴猶勝劬勞早歲龍回首不堪膏火熱試
求甘露洒青松

次韻王鞏元日

庭鵲營巢初一枝餘寒未便夾羅衣春風娜娜還吹霰歲事駸駸
已發機上國遨遊誰信老中年情味祇思歸和詩應覺添新懶過

行役饒新喜臨川逢故人相看對泉石憐我在埃塵會合終多故
分張類有神南遊得如願夢想雲溪春

次韻王輩留別

決策歸田豈世情網羅從此脫餘生請君速治雞黍具待我同爲
沮溺耕秋社相從釀錢飲日高時作叩門聲茅廬但恐非君處籍
籍朝中望已傾

次韻答孔武仲

白髮青衫不記年相逢一笑覩欣然誦詩疊疊鋸木屑展卷駸駸
下水船未肯尺尋分枉直日知鑿柄有方圓閑官更似揚州學猶
得昏昏晝日眠

送傅宏著作歸覲待觀城闕

膠西前輩鄭康成千載遺風及後生舊學詩書儒術富兼通法律
更能精還家綵服頻爲壽得邑河壻喜有兵民事近來多迫促弦

歌聊試武城聲

律有鄭氏章句

連雨不出寄張恕

麥熟蠶繅熱似烝雨傾三尺未爲淫洗清溝澮蚊蟲靜沒盡蒲蓮
沼泚深遺秉滿田驚朽腐移牀避漏畏侵尋高閑祇有張公子臥
聽蕭蕭打葉音

和子瞻自徐移湖將過宋都途中見寄五首

東武厭塵土彭門富溪山從兄百日留退食同躋攀輕帆過百步
船底驚雷翻肩輿上南麓眼界涵川原愛此忽忘歸願兄且三年
我去已怱怱兄來亦崩奔永懷置酒地遶郭多雲烟

我昔去彭城明日河流至不見五斗泥但見三竿水驚風鬱颺怒
跳沫高睥睨激灑三月餘浮沉一朝事分將食魚鼈何暇顧隣里
悲傷念遺黎指顧出完壘繚堞對連山黃樓麗清泗功成始逾歲
脫去如一屣空使西楚氓欲語先垂涕

千金築黃樓落成費百金誰言史君侈聊慰楚人心清秋吐明月

白壁懸青岑晃蕩河漢高恍恨窗戶深邀我三日飲不去如籠禽
史君今吳越雖往將誰尋

欲買兩家田歸種三頃稻因營山前宅遂作泗濱老竒窮少成事
飽暖未應早願輸橐中裝田家近無報平生百不遂今夕一笑倒
它年數畝宮懸知迫枯槁

梁園久蕪沒何以奉君遊故城已耕稼臺觀皆荒邱池塘塵漠漠
鴈鶩空遲留俗衰賓客盡不見枚與鄒輕舟舍我南吳越多清流

次韻劉貢父登黃樓懷子瞻二首

青山開四面白水繞三隅野闊時聞籟人閑舊據梧畫船留上客
遺迹問田夫事少日常飲才疎世未須決河初薦至勝事偶相俱

燕子卑無取滕王遠可樵飛濤隱睥睨落日麗浮圖同舍新持節
專城敢遽呼未迎行部駕已放下淮艦試問登消暑如何楚與吳

吳興有
消暑樓

再和

藹藹才名世駸駸日轉禺一時同接浙平昔共棲梧攬轡真壯士
擁旄良丈夫塵埃脫緇綬水石慰霜須勝地來相失清樽未暇俱
射餘空見帖鑄罷祗觀樵歸計何當決徂年貴早圖檻中終爲食
鞬上耻聞呼顧我千羊羣平生一釣艦微官不須滿也復試遊吳

陪杜克張恕鴻慶宮避暑

至後雨如瀉晴來熱更多簿書霑汗垢巖石思藤蘿賴有祠官靜
時容俗客過老郎無不可公子亦能和道勝還相接禪迷屢見詞
清涼生絕念煩暑散沉痾古木便張幄鳴禽巧當歌桃香呈絳頰
瓜熟裹青羅飯細經脣滑茶新到腹適劇談時自笑飽食更無它
適意未應厭後遊真若何官居鄰曲沼田畎助清波晚照明疎柳
微風響眾荷輕舟尚可載小雨試漁蓑

宋城宰韓秉文惠日鑄茶

君家日鑄山前住冬後茶芽麥粒龕磨轉春雷飛白雪甌傾錫水
散凝酥谿山去眼塵生面簿領埋頭汗匝膚一啜更能分幕府定

應知我俗人無

次前韻

龍鸞僅比閩團醜鹽酪應嫌扎俗龕採愧吳僧身似腊點須越女
手如酥舌根遺味輕浮齒腋下清風稍襲膚七盃未容畱客試瓶
中數問有餘無

答孔武仲

飛霜委中林不廢長松綠驚風振川野未省勁草伏我貧客去盡
君來常不速愧君贈桃李永願報瓊玉我性本山林苦學筆空秃
驂騑塞康莊病足顧難逐錦文銜華藻敝褐非所績家有五車書

恨不十年讀濟南昔相遇我齒三十六談諧傾蓋間還往白首熟
從君飲濁酒過我飯脫粟西湖多莢亂白晝下鴻鵠城西野人居
柴門擁修竹後車載鳴夷下馬瀉醽醁醉眠臥荒草空洞笑便腹
疎狂一如此豈望世收錄別來今幾何歸期已屢卜西南有薄田
茅舍清溪曲耕耘三男子伏臘嘗足君能遠相尋布衣巾一幅
送吳思道道人歸吳興二絕

一去吳興十五年東歸父老幾人在惠山唯有錢夫子一寸閒田
曉日瞰

遨遊海上冀逢人宴坐山中長閉門去住只今誰定是相逢一笑

各無言

次韻答陳之方祕丞

南山李將軍正馬獨行獵田中射虎豹後騎不容躡丈夫貴自遂
老大饒驚懾飄搖天地間自視如一葉故人多東南願作扁舟涉
忽蒙長篇贈幸此傾蓋接時世尙新奇詩書存舊業南風吹清汴
西去無停楫恨不畱君談一使眾坐厭新詩苦清壯欲和再三怯
東都多名卿投刺日盈笈一言苟合意富貴出旬浹行看文石階
高談曳長裾辱贈但茫然知君念疲爾

登南城有感示文務光王通秀才

幽憂隨秋至秋去憂未已城南試登望百草枯且死落葉投人懷
驚鴻四面起所思不可見欲往將安至斯人定誰識顧有二三子
清風皎冰玉滄浪自湔洗竊脂未嘗殺南箕儻微似網羅一張設
投足遂無寄田深狡兔肥霜降鱸魚美造形悼前失式微慙往士
憧憧邛邛道歲晚嗟未止西山有茅屋鉏耰本吾事

張公生日

是歲己未初致仕

少年談王霸英氣干斗牛中年事軒冕徇世仍多憂晚歲探至道
眷眷懷林邛今年乞身歸始與夙昔酬高秋過生日真氣茲一周
觀心比孤月視世皆浮漚表裏一融明萬物不能畱顧謂憧憧人

斯樂頗會不嗟我本俗士從公十年遊謬聞出世語俛作籠中囚
俯仰迫憂患欲去安自由問公昔年樂孰與今日優山中許道士
非復長史儔腹中生梨棗結實從今秋

次韻答張耒

客舟逝將西日夜西北風維舟罷行役坐令鬢如蓬偶從二三子
步上百尺臺雲烟遍原隰傲視令人哀山中難久居浮沉在城郭
欲學揚子雲避世天祿閣浮木寄流水行止非所期何須自爲計
水當爲我移外物不可必惟此方寸心中自有樂事手付瑟與琴
夜吟感秋詩惜此芳物零幽人亦多思起坐再三聽白駒在空林
餅罄有耻壘盡我一杯酒愁思如雲頽

次王適韻送張耒赴壽安尉二首

綠髮驚秋半欲黃官居無處覓林塘浮生已是塵勞侶病眼猶便
錦繡章羞見故人梁苑廢夢尋歸路蜀山長憐君顧我情依舊竹
性蕭疎未受霜

魏紅深淺配姚黃洛水家家自作塘遊客賈生多感槩閑官白傅
足篇章山分少室雲烟老宮廢連昌草木長路出高高應少駐屏
顏新過一番霜

次韻張耒見寄

相逢十年驚我老雙鬢蕭蕭似秋草壺將未洗兩腳泥南轅已向
淮陽道我家初無負郭田茅廬半破蜀江邊生計長隨五斗米飄
搖不定風中烟茹蔬飯糗不願餘茫茫海內無安居此身長似伏
轅馬何日還爲縱壑魚憐君與我同一手微官骭髒羞牛後請看
插版趨府門何似曲肱眠甕牖中流千金買一壺積中美玉不須
沽洛陽權酒味如水百錢一角空滿孟縣前女兒翠欲滴吏稀人
少無晨集到官惟有懶相宜臥看南山春雨濕

次韻王適兄弟送文務光還陳

三君皆親非復客執手河梁我心惻倚門耿耿夜不眠挽袖怱怱
有難色君歸使我勞覓夢落葉鳴堦自相擁君家西歸在新歲此
行未遠心先恐故山萬里知何許我欲因君亦歸去清江髣髴釣
魚船脩竹平生讀書處青衫白髮我當歸咀嚙式微慙古詩少年
勿作老人調被服榮名慰所思

次韻張芻諫議燕集

淮陽臥閣生清風梁園坐嘯囹圄空不知何術解醜髀但覺羈客
忘樊籠樽壘灑落談笑地塵埃脫去文書聚清心漸欲無一事少
年空記揮千鍾近傳移鎮股肱郡復恐入覲明光宮人生聚散不
可料一杯相屬時方冬浮陽似欲作飛霰想見觀闕瓊花中孝王

會集猶可繼莫嫌作賦無枚翁

聖民昔知陳州
余嘗從之遊矣

臘雪五首

長恐冬無雪今朝忽暗空細聲聞
蔌蔌遠勢望濛濛濕潤猶兼雨
傾斜半雜風豐登解多事歡喜助三農

其二

驕陽不能久密雪自相催急霰初鳴瓦
飛花旋集臺着人消瘴瘴
覆麥長根芟欲試樽中物門前問客來

其三

久有歸耕意西山百畝田雪來殊不惡
酒熟自相便一被簪裳裏

長遭羅網牽飛翼迫殘臘愁思渡今年

其四

憂愁不可緩風雪故相撩試問五斗米
能勝一束樵耕耘終亦飽
哺啜定誰邀寒暑不須避傾危且自遙

其五

雪霜何與我憂思自傷神忠信亦何罪
才名空誤身歸來聊且止
老去莫逢嗔樽酒它年事相看醉此晨

次韻王適雪晴復雪二首

驕陽得一雪踰尺應更好晨興視窗隙
驚見晴霞杲九衢無停迹

狼籍須一掃空餘浩然氣凜凜接清昊餘寒薄虛室一靜解羣燥
晨炊晚未供客饋慙草草試脫身上衣行問酒家保孤吟擊檣木
大笑稱有道人生但如此富貴何用禱所思獨未見耿耿屬懷抱

其二

同雲自成幄飛雪來無根一爲清風卷坐見東方暎重陰偶復合
飛霰滿南軒油然青春意已見出土萱老病一不堪惟恃濁酒温
開戶理松菊掃蕩無遺痕卷舒朝夕間誰識造化元乾坤本何施
中有神怪奔萬物極毫末顛倒何足掀老農但知種荷鋤理南園

送呂由庚推官得替還洛中二首

君家相國舊元勳凜凜中丞_公後塵談笑二年同幕府風流一倍
愈它人南都去後少佳客西洛歸來多老臣我亦宦遊無久意它
年松竹許相鄰

洛水畱人一向乾雪泥溢路十分寒送行我豈無樽酒多難君知
久鮮歡回首祇應憐老病凌風爭看試輕翰到家定見嵩陽老問

我衰遲未解官

司馬君實提舉
嵩山嵩福宮

四十一歲歲莫日歌

小兒不知老人意賀我明年四十二人生三十百事衰四十已過
良可知少年讀書不曉事坐談王霸了不疑脂車秣馬試長道一

日百里先自期不知中途有陷穿山高日莫多棘茨長裾大袖足
鉤挽卻行欲返筋力疲蝮虵當前猛虎後脫身且免充朝饑歸來
掩卷淚如雨平生讀書空自誤山中故人一長笑布衣脫粟何所
苦古人知非不嫌晚朝來聞道行當返四十一歲不可言四十二
歲聊自還

次韻子瞻繫御史獄賦獄中榆槐竹栢

秋風一何厲吹盡山中綠可憐凌雲條化爲樵夫束凜然造物意
豈復私一木置身有得地不問直與曲青松未必貴枯榆還自足
紛然落葉下蕭條愧華屋

右榆

盛衰日相尋循環何曾歇攀條攀柔荑回首驚脫葉綠槐陰最厚
零落今存莢千林一枯槁平地三尺雪草木何足道盈虛視新月
微陽起泉下生意未應絕

右槐

故園今何有猶有百竿竹春雷起新萌不放牛羊觸雖無朱欄擁
不見紅塵辱清風時一過交夏響鳴玉淵明避紛亂歸嗅東籬菊
嗟我獨何爲棄此北窗綠

右竹

曲如山下藤脆若溪上葦春風一張王秋霜死則已胡爲南澗中
辛勤種栢子上枝撓雲霓下根絞石齒伐之爲梁棟歲月良晚矣
白首閱時人君看柱下史

右栢

次韻子瞻贈張慙子

得罪南來正坐言道人閉口意深全天遊本自有眞樂羿殼誰知
定不賢構火噉噉初吐日飛流滾滾旋成川此心此去如灰冷肯
更逢人問復然

過龜山

再涉長淮水驚呼十四年龜山老僧在相見一茫然僧老不自知
我老私自憐驅馳定何獲少壯空已捐掉頭不見答笑指岸上船
人生何足云陵谷自變遷當年此山下莫測千仞淵淵中械神物
自昔堯禹傳帆檣避石壁風雨隨香烟爾來放冬泝冷沙漲成田
褰裳六月渡中流一帶牽俯首見砂礫羣漁捕魴鱸父老但驚歎
此理未易原何況七尺軀不爲物所旋眾形要同盡獨有無生全
百年爭奪中擾擾誰相賢

放閘二首

畫舫連檣住清流汎閘平忽看銀漢落仍聽夏雷驚正柂遲迴久

開頭取次輕滯畱初一快奔駛忽如傾
不識風濤恐聊同枕席行
行逢賤魚稻飽食慰平生

其二

聞空非有礙水靜爲誰興開閉偶然異
喧豗自不勝淵停初鏡淨
勢轉忽雲崩脫隘尙容與投深益沸騰
玉山紛破碎陳馬急侵陵
挾版千鈞重浮舟萬斛升岸搖將落木
魚困或投層洶湧曾誰止
蕭條遠欲凝力爭知必折少待亦何能
一發臨流笑微言早服膺

次韻王適細魚

羣魚一何微僅比毛髮大嬉遊極草草
鬣鬣自箇箇造物賦羣形
偶然如一唾吞舟雖云巨其樂不相過
若言無性靈還知避船柂

高郵別秦觀三首

濛濛春雨濕邗溝蓬底安眠晝擁裘
知有故人家在此速將詩卷
洗閑愁

筆端大字鴉棲壁袖裏清詩句琢冰
送我扁舟六十里不嫌罪垢
汙交朋

高安此去風濤惡猶有廬山得縱遊
便欲攜君解船去念君無罪
去何求

召伯埭上斗野亭

細雨添春色微風淨牖流徂年半今世生計一扁舟飲食隨魚蟹
封疆入斗牛江波方在眼轉覺此生浮

次韻鮮于子駿遊九曲池

天高山近海春盡草生池禾黍多新恨川原自昔時花存故苑麗
樵出舊城隳莫望瓜洲渡曾經駐佛狸

楊州五詠

九曲池

嵇老清彈怨廣陵隋家水調繼哀音可憐九曲遺聲盡惟有一池
春水深鳳闕蕭條荒草外龍舟想像綠楊陰都人似有興亡恨每

到殘春一度筭

平山堂 歐陽永叔所建

堂上平看江上山晴光千里對憑欄海門僅可一二數雲夢猶
八九寬簷外小棠陰蔽芾壁間遺墨涕洟瀾人亡坐使風流盡遺
構似百子細觀

蜀井 在大明寺

信脚東遊十二年甘泉香稻憶歸田行逢蜀井恍如夢試煮山茶
意自便短綆不收容盥濯紅泥仍許置清鮮早知鄉味勝爲客遊
宦何須更着鞭

摘星亭 迷樓舊址

闕角孤高特地迷迷藏渾忘日東西江流入海情無限莫雨連山
醉似泥夢裏興亡應未覺後來愁思獨難齊只堪畱作遊觀地看
遍峰巒處處低

僧伽塔

山頭孤塔闕真人云是僧伽第二身處處金錢追晚供家家蠶麥
保新春欲求世外無心地一掃胸中累劫塵方丈近聞延老宿清
朝畱客語逡巡

題杜介供奉熙熙堂

門前籍籍草生徑堂上熙熙氣吐春遮眼圖書聊度日放情絲竹
最關身年來馮脫烏皮几客去時乾漉酒巾卜築城中移榜就休
心便作廣陵人

遊金山寄楊州鮮于子駿從事邵光

揚州望金山隱隱大如幙塔來長江上孤高二千尺僧居厭山小
面面貼蒼石虛樓三百間正壓江湖白清風斂霽霧曉日耀金碧
直侵魚龍居似得鬼神役我行有程度欲去空白惜風吹渡江水
山僧午方食波瀾洗我心筍蕨飽我腹平生足遊衍壯觀此云極
鐵甕本誰安海門復誰植東南遞隱見遙與此山匹茲遊幾不遂

深愧幕府客歸時日已莫正值江月黑顧視天水并坐恐星斗濕
使君何時罷登覽不可失

初至金陵

山川過雨曉光淨初看江南第一州路繞匡廬更南去懸知是處
可忘憂

